

# Ergaa Phexros Erge

## Isa Duraa

### Nagaa

1 'Ani Phexros ergamaan Yesus  
Kristos kana caafuu koo ti.

Haa ga'u gara warra fo'amanii, isaanis warra biyyaa baafamanii kutaa biyya Phonxositti, Galaatiyaatti, Qaphadootiyaatti, Asiyaatti akkasumas Bitiiniyaatti tamsa'anii jiranii\*. 2 Isin akka akeeka Waaqayyoo abbaatti, Yesus Kristosiif abboomamuuf, dhiiga isaa-tiinis qulleeffamuuf, hafuura qulqul-luudhaan qulqulleeffamtanii fo'amtaii.

Ayyaannii fi nagaan isiniif haa baay'atu\*!

\*1 Yaq 1:1

\*2 Rom 8:29; Ibr 12:24

### Abdii Jiraatu Akka Qaban Yaadachiisuu Isaa

3 Waaqayyoo abbaa gooftaa keeyyaa Yesus Kristosiif galanni haa ta'u! nni araara isaa isa guddaadhaan, Yesus Kristos warra du'an keessaa ka'uu saatiin, abdii isa jiraataa kanatti qamnee akka jiraannuuf haaraa godhee u dhalachiiseera\*. 4 Waan hin badne, waan xurii hin qabne, waan gad deebi'aa hin adeemnes, isa waaqa keesatti isiniif eegamee jirutti darbitanii kka fudhattan godheera\*. 5 Kunis, isin warra, karaa amantii fayyina bara ooddeetti mul'achuuf qophaa'ee

taa'u sanaaf, humna Waaqayyootiin eegamtanii jirtaniif in ta'a\*. 6 Amma yeroo gabaabduudhaaf qorama garaa garaatiin gaddisiifamuun keessan kan hin oolle yoo ta'e iyyuu, isa sanatti immoo baay'iftanii in gammaddu\*. 7 Warqeen inni baduuf jiru iyyuu ibiddaan in qorama; amantiin keessan inni warqee caalaa gati-jabeessi immoo, guyyaa Yesus Kristos itti mul'achuuf jiru sanatti, jajamee guddinaa fi ulfina akka argatutti qoramee in ilaalama\*. 8 Isin isa mul'achuuf jiru sana hin argine yoo ta'e iyyuu, isa in jaallattu; amma yoo isa arguu dhaabaattan iyyuu, isatti in amantu akkasumas gammachuu akkas jedhamee hin dubbatamnee fi gammachuu ulfina guddaa qabuun in gammaddu\*. 9 Fayyina lubbuu keessanii, isa amantiin keessan bira ga'uudhaaf akeekkachaa jiru argachuutis in gammaddu\*.

\*3 Efe 2:4-6

\*4 Qol 1:5

\*5 1Qor 2:5; Yoh 10:28-29

\*6 4:12-13; 5:10; Yaq 1:2; Ibr 12:11

\*7 Fak 17:3; Mil 3:3; Yaq 1:3

\*8 Yoh 20:29; 2Qor 5:7

\*9 Ibr 10:39

10 Raajonni warri waa'ee ayyaana isiniif kennamuuf ture sanaa raajii dubbatan, fayyina kana barbaadanii waa'ee isaa qoratan\*. 11 Isaan waa'ee dhiphina Kristosin argatuu, waa'ee

ulfina booddeedhaan isaaf dhufuuf jiru, duraan dursanii yeroo dubbatan, hafuurri Kristos inni isaan keessa ture, gara nama attamii yookiis yeroo attamii akka inni argisiisaa ture in qoratan\*. <sup>12</sup>Wanti isaan hojjechaa turanis mataa isaaniif utuu hin ta'in, isiniif akka ture mul'ifameera\*. Kunis hafuura qulqulluu isa waaqa irraa ergameen, amma karaa warra wangeela lallabani, isinitti himame; kana immoo ergamoonni Waaqayyoo iyyuu keessa lixanii ilaaluu in hawwu turan\*.

\*10 Mat 13:17; Luq 10:24

\*11 Luq 24:26; Far 22:1-31; Isa 53:1-12

\*12 Efe 3:10

### Gara Jireenya Qulqullaa'aa Jiraachuutti Waamuu Isaa

<sup>13</sup>Kanaaf mudhii yaada keessanii jabeeffadhaa, warra of qaban ta'aa, abdii keessan guutummaatti ayyaana isa yeroo Yesus Kristos mul'atutti isiniif dhufu irra kaa'adhaa\*! <sup>14</sup>Akka ijoollee abboomamanii ta'aa malee, kajeellaa foonii isa bara gowwummaa keessanii duukaa hin luucca'inaa\*! <sup>15</sup>Inni isin waame qulqulluu akkuma ta'e, isinis adeemsa keessan hundumaan qulqulloota ta'aa!

<sup>16</sup>Inni caaffata qulqullaa'aa keessatti,

"Ani qulqulluu waanan ta'eef, isinis qulqulloota ta'aa!" jedheera\*.

\*13 Luq 12:35

\*14 Rom 12:2; Efe 4:17-18

\*16 Lew 11:44-45; 19:2

<sup>17</sup>Isa nama utuu wal hin caalchisin, adduma addaan akka hojii isaatti faradu sana "Abbaa" jettanii in waammattu yoo taatan, bara itti akka ormaatti jiraattan hundumaatti isa safeeffachuutti jiraadhaa\*! <sup>18</sup>Akka jireenya keessanii isa abboota keessan irraa isinitti darbee, isa waa'ee hin baafne sana jalaa, wanta badu waan akka meetii yookiis warqeetiin akka hin furamin, isin iyyuu in beektu\*. <sup>19</sup>Garruu Kristos dhiiga isaa isa gati-jabeessaan, isin fureera; inni akka hoolaa mudaa yookiis xurii hin qabnee ti\*. <sup>20</sup>Inni uumamuu biyya lafaa dura yaadaa qabame; gara dhuma barichaatti immoo isiniif jedhee mul'ifame\*. <sup>21</sup>Karaa isaa isin immoo Waaqayyoo isa

du'aa isa kaasetti ulfinas kenneeffitti, warra amanat taataniittu; akkasumas amantiin keessanii fi abdiin keessan Waaqayyotti jabaachuu isaa ti.

\*17 Mat 6:9; Rom 2:11

\*18 1Qor 6:20

\*19 Ibr 9:14

\*20 Rom 16:25-26; 2Xim 1:9-10

<sup>22</sup>Isin dhugaadhaaf abboomamuu keessaniin, jireenya keessan qulleeffatanii, obboloota garaa qulqulluudhaan jaallachuu bira geessaniittu; ammas jaalala ho'aa isa garaa keessaa dhufuun wal jaalladhaa\*! <sup>23</sup>Isin sanyii baduttii utuu hin ta'in, sanyii hin badnettii sagalee Waaqayyoo isa jiraataa fi isa akka jirutti hafuun, haaraa taatanii dhalattaniittu\*. <sup>24</sup>Kanaaf caaffanni qulqullaa'aa,

"Namni foon uffate hundinuu akka margaa ti,

ulfinni isaa hundinuus akka daraaraa margaa ti;

margichi in coollaga, daraaraan isaas in harca'a\*.

<sup>25</sup>Dubbiin gooftichaa garuu, hafee bara baraan in jiraata" in jedha;

dubbiin kun immoo isa misraachoo isinitti himamee dha.

\*22 4:8; Rom 12:10; 1Yoh 3:18

\*23 Yoh 1:13; Yaq 1:18

\*24 Isa 40:6-8; Yaq 1:10-11

### Dubbii Isa Dhuga-Qabeessaan Akka Guddatan Gorsuu Isaa

<sup>2</sup>Ammas hammina hundumaa, haxxummaa hundumaa, of arguu dhabuu, weennoo, maqaa namaa ballessuu hundumaas of irraa fageessaa\*!

<sup>2</sup>Akka mucooliin reefuu dhalatan aannan barbaadanitti, isinis fayyinaaf ittiin guddachuudhaaf yeroo hundumaa dubbii hafuura isa haxxummaan keessa hin jirre akka aannanii sana dharra'aa\*! <sup>3</sup>Isin gaarummaa gooftaa miyeeffataniittu yoo ta'e, kana in gootu\*.

\*1 Efe 4:22; Yaq 1:21

\*2 Ibr 5:12-13

\*3 Far 34:8

### Kristositti Cimanii Saba Waaqayyoo Akka Ta'an Yaadachiisuu Isaa

<sup>4</sup>Gooftichi inni isin gara isaa dhuftan kun akka dhagaa jiraataa ti;

namoonni dhagaa sana in tuffatan; inni garuu Waaqayyoo biratti fo'amaa dha gati-qabeessas\*. <sup>5</sup>Isinis luboota qulqullummaa ta'uudhaaf; aarsaa hafuura isa karaa Yesus Kristos Waaqayyoo duratti fudhatamu dhi'eessuudhaaf, akka dhagoota jiraatootti ijaarsa mana isa hafuura sanaaf ta'aa\*! <sup>6</sup>Caaffata qulqullaa'aa keessa,

"Kunoo, dhagaa mataa golee qajeelchu,

isa fo'amaa, isa gati-qabeessas

Xiyoon keessa nan kaa'a; inni isatti amanatu immoo hin yeella'u"

kan jedhu jira\*.

<sup>7</sup>Isin warra itti amantaniif dhagaan kun gatii guddaa qaba; warra itti hin amanneef garuu, caaffanni qulqullaa'aa akkuma jedhutti,

"Dhagichi, mana ijaartuun tuffatan,

inni dhagaa mataa golee qajeelchu ta'e\*\*.

<sup>8</sup>Akkasuma immoo, "Inni dhagaa nama gufachiisu,

kattaa nama kuffisus ta'e" in jedha;

isaan sababii dubbichaaf abboomamuu didaniif in gufatu, kunis isaan irratti yaadamee ture\*.

\*4 Far 118:22; Mat 21:42

\*5 Efe 2:21-22; Rom 12:1

\*6 Isa 28:16; Rom 9:33

\*7 HoE 4:11; Far 118:22

\*8 Isa 8:14-15

<sup>9</sup>Isin garuu qomoo fo'amaa dha, luboota mana mootummaa ti, saba qulqullaa'aa dha, warra dhuunfaa Waaqayyoo ta'anii dha. Waaqayyoo hojii isaa isa jajamaa akka labsitaniif dukkana keessaa, gara ifa isaa isa dinqisiisaatti isin waame\*. <sup>10</sup>Isin takka saba Waaqayyoo hin turre, amma garuu saba isaa taataniittu; isin araara Waaqayyoo hin argatin turtan, amma garuu araara isaa argattaniittu\*.

\*9 Bau 19:5-6; Kes 4:20; 7:6; 14:2;

Isa 43:20-21; Mul 1:6; Efe 5:8; Tit 2:14

\*10 Hos 1:6,9; 2:1,23; Rom 9:25

### Waan Hojjetoota Waaqayyoo Irraa Barbaadamu Gorsuu Isaa

<sup>11</sup>Michoota ko! Isin warra ormumaatti jiraattan, warra biyyaa baafamnis nan gorsa; fedha foonii isa lubbuu

keessan lolu irraa fagaadhaa\*! <sup>12</sup>Akki isin warra saba Waaqayyoo hin ta'in keessa itti jiraattan gaarii haa ta'u! Akka waan isin hamaa hojjetaniitti warri maqaa keessan balleessan kun, hojii keessan isa gaarii arganii, guyyaa itti Waaqayyoo namoota isaa ilaaluu dhufutti, isaaf ulfina haa kennan\*!

\*11 Far 39:12

\*12 Mat 5:16

<sup>13</sup>Gooftaadhaaf jedhaatii harka warra aboon kennameefii jala of galchaa, mootii isa hundumaa irratti aboo qabuuf abboomamaa\*! <sup>14</sup>Warra abboota biyyaa ta'anii namoota waan jal'aa hojjetan adabuuf, namoota waan qajeelaa hojjetan immoo galateeffachuuf isa biraa ergamaniifis abboomamaa! <sup>15</sup>Waaqayyoo waan qajeelaa hojjechuu keessaniin namoota warra qalbii malee wallaalummaadhaan dubbatan akka isin afaan qabachiifan in barbaada\*. <sup>16</sup>Akka warra birmaduu Waaqayyooof garboota ta'aniitti jiraadhaa! Garuu birmadummaan keessan kan ittiin hamaa hojjetanii dhoksitan hin ta'in\*. <sup>17</sup>Namoota hundumaaf ulfina kennaa; obbolummaa amantootaa jaalladhaa; Waaqayyoon sodaadhaa; mootiidhaaf ulfina kennaa\*!

\*13 Rom 13:1-7; Tit 3:1

\*15 3:16

\*16 Gal 5:13

\*17 Rom 12:10; Fak 24:21; Mat 22:21

### Dhiphinni Kristos Fakkeenya Isaaniif Ta'uu Isaa

<sup>18</sup>Isin warri garbummaa jala jirtan, gooftota keessaniif ulfina kennuudhaan ajaja isaaniif jala bulaa! Kanas warra babba'eeyyii fi garraamotaaf duwwaa utuu hin ta'in, warra gaggadheefis immoo akkasuma godhaa\*! <sup>19</sup>Namni Waaqayyoon yaadachaa miidhama sababii malee isa irra ga'u yoo baate, ayyaana in argata\*. <sup>20</sup>Balleessaa keessaniif isa rukutamtan yommuu obsitan, galata maalii qabdu? Garuu gaarii gochuu keessaniif isa dhiphattan yommuu obsitan, Waaqayyoo biraa ayyaana in argatu\*. <sup>21</sup>Isin kana gochuudhaaf waamantaniittu; Kristos immoo isiniif dhiphatee, faana isaa duukaa akka buutaniif fakkeenya isiniif kenneera\*. <sup>22</sup>Caaffata qulqullaa'aa keessa, "Inni cubbuu hin

hojjenne, dubbii isaa keessatti haxxummaan hin argamne" kan jedhu jira\*.  
<sup>23</sup>Inni yommuu arrabsame deebisee hin arrabsine; yommuu dhiphates Waaqayyo isa firdii qajeelaa faradutti kennate malee, warra isa dhiphisan hin doorsifne\*. <sup>24</sup>Nuyi cubbuu jalaa duunee qajeelinaaf akka jiraannuuf, inni ofii isaatii cubbuu keenya dhagna isaatiin baatee fannootti ol ba'e; madaa'uu isaatiin isin in fayyifamtan\*.

\*18 Efe 6:5; Tit 2:9

\*19 Mat 5:10

\*20 3:14,17; 4:13-14,16

\*21 Mat 16:24; Yoh 13:15

\*22 Isa 53:9; Yoh 8:46; 2Qor 5:21

\*23 3:9; Isa 53:7

\*24 Isa 53:5; Rom 6:11,18

<sup>25</sup>Isin akka hoolotaa karaa irraa baddanii turtan, amma garuu gara tiksee fi ilaaltuu lubbuu keessaniitti deebitaniittu\*.

\*25 Isa 53:6; Yoh 10:11,14

### **Haati Manaa Abbaa Manaaf Fakkeenya Gaarii Ta'uu Danda'uu Ishee**

**3** <sup>1</sup>Akkasumas isin dubartoota nana, warra dhiiraa keessaa kaan dubbii Waaqayyoo hin amanne yoo ta'an iyyuu, isin waan tokko utuu hin dubbatin, amala isin warri haadhota manaa isaanii taatan argisiiftaniin akka mo'amanitti, abboota manaa keessaniif abboomamaa\*! <sup>2</sup>Isaan amala keessan isa qullaa'aa fi isa sodaa Waaqayyoo argisiisu in argu. <sup>3</sup>Of kuuluun keessan, wanta alaan mul'atu, mataa tolfachuudhaan, warqee nagachuudhaan, uffata babba'eessa uffachuudhaanis hin ta'in\*! <sup>4</sup>Garuu of kuuluun keessan inni hin badne keessa namummaa keessanii isa dhokataadhaan haa ta'u! Kunis hafuura garraamummaa fi gabii isa Waaqayyoo duratti guddaa gati-jabeessa ta'e sanaan haa mul'atu! <sup>5</sup>Bara duriitti dubartoonni Waaqayyoof qulqullaa'anii isa abdatan, akkasitti abboota manaa isaanitiif abboomamuudhaan of kuulaa turan. <sup>6</sup>Saaraan akkas Abrahamaaif abboomamaa, gooftaa koo jettees isa waamaa turte; ammas isin gaarii yoo gootan, doorsisa tokkos hin sodaattan yoo ta'e, ijoolllee ishee ta'uu keessan\*.

\*1 Efe 5:22; Qol 3:18; Tit 2:5

\*3 1Xim 2:9

\*6 18:12

<sup>7</sup>Akkasuma isinis dhiirota nana, dubartoota keessaniif beekaatii wajjin jiraadhaa! Walii wajjin jireenya isa tola isiniif kennamutti galuuf waan jirtaniif, kadhanni keessan gufuu argatee akka hin ittifamnetti, dubartii keessan akka gar tokko dhagna keessanii isa dadhabaatti ulfina kennaaf\*!

\*7 Efe 5:25; Qol 3:19

### **Sababii Waan Gaarii Hojjetaniif Dhiphachuun Bu'aa Qabaachuu Isaa**

<sup>8</sup>Ammas hundumti keessan hafuuraan, dhageettii yaada garaatiinis tokkummaa qabaadhaa! Obboloota jaallachuudhaan, gara-laafinaan, gad of deebisuudhaanis walii wajjin jiraadhaa\*! <sup>9</sup>Hamaa, hamaadhaan, abaarsas, abaarsaan hin deebisinna! Garagalchii iyyuu eebbisa! Isin eebba akka argattaniif waamamtan\*.

<sup>10</sup>Caaffanni qulqullaa'aan,

"Namni jireenyatti gammaduu barbaadu,

inni bara gaarii arguu fedhus,

arraba isaa hamaa dubbachuuttii,

afaan isaas haxxummaadhaan

dubbachuuttii haa ittisu!

<sup>11</sup>Inni hamaattii garagalee gaarii haa godhu,

nagaa haa barbaadu, duukaas haa bu'u!

<sup>12</sup>Iji gooftichaa,

gara warra qajeelotaa in ilaala;

gurri isaas kadhata isaanii in dhaga'a;

garuu fuulli gooftichaa warra hamaa godhanitti

nyaara guureera" in jedha\*.

\*8 Filp 2:2-3

\*9 2:23; Mat 5:44; 1Tas 5:15; Rom 12:14,17

\*10-12 Far 34:12-16; Yaq 1:26

<sup>13</sup>Wanta gaarii gochuudhaaf warra hinaafan yoo taatan, eenyutu hamaa isin irratti hojjetaa? <sup>14</sup>Wanta qajeelaadhaaf utuu dhiphattanii iyyuu immoo attam gammaddu laata! Sodaachisa warra isin sodaachisanii hin sodaatinaa! Hin raafaminaas\*! <sup>15</sup>Kristosiif garuu akka gooftaatti garaa keessan keessatti ulfina addaan ba'e kennaaf! Waa'ee abdii isin keessa jiruuf, nama isin gaafatee, deebii isin irraa barbaaduuf, deebii ga'u deebisuudhaaf yeroo hundumaa qophaa'oo ta'aa! <sup>16</sup>Deebiin keessanis

arraba laafaadhaan nama safeeffachuudhaanis haa ta'u! Warri hamaa isin irratti dubbachuudhaan maqaa keessan balleessan, amala keessan isa gaarii, isa erga kan Kristos taatanii argisiiftan sana hammeessan akka yeella'aniif, yaadni garaa keessanii akka isin hin ceephaanetti jiraadhaa\*! <sup>17</sup>Isa hamaa godhaniif dhiphachuun mannaa, jaalala Waaqayyoo taanaan, sababii wanta gaarii godhaniif dhiphachuun wayya\*.

\*14 2:20; Mat 5:10; Isa 8:12-13

\*16 2:15

\*17 2:20; 4:13-14,16

<sup>18</sup>Kristos immoo gara Waaqayyooitti isin fiduudhaaf jedhee, yeroo hundumaaf akka ta'utti al tokkicha, cubbuu namoota baay'etiif dhiphateera; inni qajeelaan foon uffatee, qooda warra jal'ootaa ajjeefame, hafuuraan jiraachifameera\*. <sup>19</sup>Hafuuraan sanaanis dhaqee hafuurota warra mana hidhaa keessa jiranitti lallabe\*. <sup>20</sup>Isaan hafuurota namoota warra dura bara Nohitti, yeroo markabni tolfame, yommuu Waaqayyoo obsaan isaaniif ceggaachaa turetti, isaaf hin abboomamin hafanii dha. Markaba kanaan namoonni muraasi, kana jechuun lubbuun saddeet bishaan keessaa oolan\*. <sup>21</sup>Kunis fakkeenya cuuphaa isa isin amma ittiin ooltanii ti; cuuphaan waan ittiin karaa du'aa ka'uu Yesus Kristos, yaada garaa nama hin ceephaane argachuudhaaf, Waaqayyotti himatanii dha malee, waan ittiin xurii dhagnaa dhiqatan miti\*. <sup>22</sup>Inni du'aa ka'e sun gara waaqaatti ol ba'ee, gara mirga Waaqayyoo jira; ergamoonni Waaqayyoo, warri aboo qabu jedhamanii sodaataman, humnoonnis harka isaa jala jiru\*.

\*18 2:21-24; Rom 6:10

\*19 4:6

\*20 Uma 6:1-22; 7:1-24; 2Phe 2:5

\*21 1Ibr 10:22; Efe 5:26

\*22 Efe 1:20-21

### **Akka Jaalala Waaqayyooitti Akka Jiraatan Gorsuu Isaa**

**4** <sup>1</sup>Kristos namummaa fooniitiin erga dhiphatee, isinis immoo akkuma isaa yaaduudhaan, akka nama lolaaf mi'a hidhateetti taa'aa! Namni namummaa fooniitiin dhiphatu cubbuutti of kennuu dhiiseera\*. <sup>2</sup>Egaa foon akka

uffattanitti bara si'achi itti jiraatanitti akka jaalala Waaqayyooitti malee, akka hawwa namaatti jiraachuun keessan haa hafu! <sup>3</sup>Wanta warri saba Waaqayyoo hin ta'in hojjechuu jaallatan hojjechuudhaan, yeroon isin dabarsitan in ga'a. Bara sanatti gad-dhiisatti, hawwa keessan raawwachuutti, machiitti, gar-malee nyaachuutti, gar-malee dhuguutti, waaqayyoliif tolfamaniif sagaduu keessattis karaa baay'ee seera Waaqayyoo irra daddarbuutti jiraachaa turtan\*. <sup>4</sup>Isa isin amma isaanitti dabalamtanii lolaa jireenya ittisa hin qabneetiin fudhataamu dhiifan in dinqifatu, maqaa keessanis in balleessu. <sup>5</sup>Isaan immoo waan godhan sababii isaa wajjin isa warra jiranii fi warra du'anitti faraduuf qophaa'etti himuuf jiru\*. <sup>6</sup>Kanaaf warra du'aniif iyyuu wangeelli in lallabame; warri du'an sun sababii nama ta'aniif fooniin du'uun yoo itti faradame illee, hafuuraan jireenya Waaqayyoo kennuufitti in jiraatu\*.

\*1 2Qor 5:14-15; Rom 6:6-7

\*3 Efe 2:2-3; Tit 3:3

\*5 2Xim 4:1

\*6 3:19

### **Kennaa Waaqayyootiin Akka Hojjetan Gorsuu Isaa**

<sup>7</sup>Dhumni waan hundumaa dhi'ateera; egaa warra of qaban, kadhata gochuufis warra eeggatan ta'aa\*! <sup>8</sup>Baay'inni cubbuu akka deebi'ee hin argamne kan godhu jaalala waan ta'eef, hundumaa dura immoo jaalala ho'aa waliif qabaadhaa\*! <sup>9</sup>Wal simachuun keessatti namoonni guungummii malee keessummoota simachuun haa jaallatan\*! <sup>10</sup>Akka hojii adeemsiftuu gaggaariin kennaa Waaqayyoo isa garaa garaa hojii irra oolchanitti, namni adduma addaan kennaa ayyaanaa isa argate, warra kaaniifis akka waa'ee baasutti ittiin haa hojjetu. <sup>11</sup>Inni dubbatu, isa Waaqayyoo jedhe haa dubbatu; inni waa hojjetus, humna Waaqayyoo isaaf kenneen haa hojjetu; Waaqayyoo waan hundumaan karaa Yesus Kristos ulfina haa argatu! Isaaf ulfinnii fi aangoon baraa hamma bara baraatti haa ta'u! Ameen\*.

\*7 1Qor 10:11; 1Yoh 2:18

\*8 1:22; Fak 10:12; Yaq 5:20

\*9 1Ibr 13:2

\*11 Rom 12:7; 1Phe 5:11

### Kristosiif Dhiphachuutti Akka Gammadan Gorsuu Isaa

12 Michoota ko, wanti akka ibiddaa gubu isin qoruudhaaf yommuu isin irra bu'u, waan takkaa ta'ee hin beekne waan isin irra bu'e fakkaatee, isin hin dinqifachiisin\*! <sup>13</sup>Kristos ulfina isaa tiin yommuu mul'atu, gammaddanii akka ililchitanitti, hammuma dhiphina isaa keessaa hirmaattuu taatan, isinis hammasuma gammadaa\*! <sup>14</sup>Maqaa Kristosiif jettanii yommuu arrabsam-tan, isin warra gammadanii dha; ha-fuurri ulfinaa inni kan Waaqayyoo isin irra in boqota\*. <sup>15</sup>Garuu isin keessaa tokko iyyuu nama gumaa yookiis hat-tuu, nama hamaa hojjete yookiis nama namatti darbe ta'ee hin dhiphatin! <sup>16</sup>Kristiyaana ta'uu isaatiif yoo dhipha-te garuu hin yeella'in! Maqaa Kristo-siin waamamee isa hojjete sanaan Waaqayyoof ulfina haa kennu\*!

\*12 1:6-7; Yaq 1:12

\*13 Rom 8:17; Yaq 1:2

\*14 2:20; Mat 5:10-11; HoE 5:41

\*16 HoE 11:26; Filp 1:20

17 Yeroon firdiin kennamu ga'eera; firdiin kunis warra mana Waaqayyoo keessaatti in jalqabama; erga dura nutti in jalqabama ta'ee, dhumni warra wan-geela Waaqayyoo amanuu didanii maal haa ta'u ree\*? <sup>18</sup>Caaffanni qulqul-laa'aan, "Namni qajeelaan fayyuun rakkinaan erga ta'ee, namni Waaqayyoo malee jiraatuu fi namni cubbamaan attam ta'uuf jira ree?" jedha\*. <sup>19</sup>Kanaafis warri akka jaalala Waaqayyootti dhiphatan iyyuu, gaarii hojjechuudhaan lubbuu isaanii uumaa isaanii isa amanamaatti hadaraa haa kennatan\*!

\*17 Er 25:29; His 9:6; 2Tas 1:8

\*18 Fak 11:31

\*19 Far 31:5; Luq 23:46

### Warra Karra Waaqayyoo Eegan Gorsuu Isaa

**5** <sup>1</sup>Ani akkuma isaanii maanguddoo, dhuga-baatuu dhiphina Kristos akkasumas hirmaattuu ulfina isa mul'achuuf jiruu ta'ee, maanguddoota isin gidduu jiran nan gorsa\*. <sup>2</sup>Karra hoolootaa isa Waaqayyoo tikaaf isinitti kenne sana, giddiidhaan utuu hin ta'in, jaalalaan, akka Waaqayyoo barbaadutti, bu'aa nama yeellaasisu irraa argachuuf utuu hin ta'in, of kennuudhaan egaa\*!

<sup>3</sup>Hoolota karra sanaaf fakkeenya ta'uudhaan egaa malee, warra tika keessan jala jiran irratti gooftummaa argisiisuudhaan miti\*. <sup>4</sup>Gaafa angafni tiksootaa sun mul'atutti, isinis immoo gonfoo ulfinaa isa gad deebi'aa hin adeemne in argattu\*.

\*1 Mul 1:9

\*2 Yoh 10:12; 21:17; HoE 20:28

\*3 2Qor 1:24; Filp 3:17; Tit 2:7

\*4 Ibr 13:20; 1Qor 9:25; 2Xim 4:8

<sup>5</sup>Akkasuma isin warri gara ijool-lees, maanguddootaaf abboomamaa! Hundumti keessanis gad of deebisu akkuma uffataatti uffadhaatii, walii keessanii wajjin jiraadhaa! Caaffanni qulqullaa'aan, "Waaqayyoo warra koo-raan ol of qabaniin in morma, warra gad of deebisaniif immoo ayyaana in kenna" in jedha\*.

\*5 Efe 5:21; Fak 3:34; Yaq 4:6; Mat 23:12

<sup>6</sup>Kanaafis Waaqayyoo yeroon isaa yommuu ga'u akka ol isin qabutti, harka isaa isa aango-qabeessa jalatti gad of deebisaa\*! <sup>7</sup>Inni isiniif waan yaaduuf, yaaddoo keessan hundumaa Waaqayyotti gataatii dhiisaa\*! <sup>8</sup>Of qabaa, dammaqaas! Seexanni hamajaajin keessan akka leenci yeroo beela'utti aadaa naanna'utti, nama liqimsuu barbaadee in naanna'a\*. <sup>9</sup>Dhiphinni sanyiin isa kan keessanii kun, obboloote keessan warra guutummaa biyya lafaa keessa jiraatanitti akka dhufu beekaatii, warra amantiitti jabaattan ta'aa, Seexa-naan mormaas\*! <sup>10</sup>Yeroo gabaabduudhaaf erga dhiphattanii booddee garuu, Waaqayyoo inni ayyaanni hundinuu bira argamu, inni karaa Kristos gara ulfina isaa bara baraatti isin waame, ofii isaatii iddootti isin in deebisa, isin in dhaaba, isin in jabeessa, hundee keessanis in cimsa\*. <sup>11</sup>Aangoon baruma baraan isaaf haa ta'u! Ameen\*.

\*6 Yaq 4:10; Mat 23:12; Luq 14:11; 18:14; Iyo 22:29

\*7 Far 55:22; Mat 6:25; Filp 4:6

\*8 1Tas 5:6; Yaq 4:7

\*9 Efe 6:11-13

\*10 Efe 3:16-17

\*11 4:11

### Gara Dhumaatti Nagaa Dhaamuu Isaa

<sup>12</sup>Ani harka Silwaanosa isa ani obboleessa amanamaatti fudhadhu sa-naan, ergaa gabaabduu kana ittiin isin

orsuudhaaf, kun ayyaana Waaqayyoo a dhugaa ta'uu isaas dhugaa ba'uu-aaf isiniif caafeera. Ayyaana kanatti baadhaa dhaabadhaa\*! <sup>13</sup>Waldaan akka keessan fo'amtee Baabilon jirtu, gaa isiniif in ergiti; Maarqos ilmi koos kasuma nagaa isiniif in dhaama\*.

<sup>14</sup>Jaalala obbolummaatiin wal dhudhunchachuudhaan nagaa wal gaafadhaa!

Nagaan isin warra kan Kristos taatan hundumaaf haa ta'u!

\*12 HoE 15:22,40

\*13 HoE 12:12,25; 13:13; 15:37-39;

Qol 4:10; Film la 24

## Ergaa Phexros Erge Isa Lammaffaa

### Nagaa

<sup>1</sup>Ani Simoon Phexros, Yesus Kristosiif hojjetaa, ergamaas ke, warra karaa qajeelina Waaqayyoo nyaaf fayyisaa keenyaa Yesus Kristos amantii gati-jabeessa isuma nuyi anne sana argataniif caafuu koo ti. <sup>2</sup>Waaqayyoon, gooftaa keenya susinis beekuu bira ga'uu keessa-ayyaannii fi nagaan isiniif haa y'atu.

### Isa Itti Waamamanii Fo'amanitti Akka Jabaatan Gorsuu Isaa

<sup>3</sup>Nuyi, Waaqayyoo isa ulfina isaa fi na isaa isa dinqisiisaadhaan nu me beekuu bira ga'uudhaan wanta barbaachisu hundumaa arganneerra. <sup>4</sup>Ittaan humna waaqayyummaa isaa-gara jireenyaatti nu geessuuf, na-ota Waaqayyoo nu godhachuudhaaf a hundumaa nuuf kenneera\*. <sup>5</sup>Ken-kanaan isin badiisa, isa sababii ellaa fooniitiif biyya lafaa kana isa jiru jalaa baatanii, dhagna ha-aa isa kan Waaqayyoottii hirmaat-akka taataniiif abdiin gati-jabeeyi-ii fi gurguddoonni nuuf kennama-1. <sup>6</sup>Ammas dhama'uu hundumaan na'aa! Amantii qabdan gaarum-dhaan argisiisaa, gaarummaa kees-beekumsa argisiisaa\*! <sup>7</sup>Itti dabal-1 immoo beekumsa keessaan of u, of qabuu keessaan obsaan dan-u, obsaan danda'uu keessaan nama

Waaqayyoo ta'uu keessan argisiisaa! <sup>7</sup>Nama Waaqayyoo ta'uu keessaan ob-boloota jaallachuu, obboloota jaalla-chuu keessaan nama hundumaa jaalla-chuu argisiisaa\*! <sup>8</sup>Wanti kun hundinuu isin irraa argamanii baay'achaa yoo adeeman, gooftaa keenya Yesus Kris-tosin beekuutti warra dhimma baasan, warra ija godhatanis in taatu\*. <sup>9</sup>Namni wanti kun hundinuu irraa hin argamne immoo, nama of irraa butee hin ilaalle, jaamaa dhas; inni cubbuu isaa isa duriititii qulleeffamuu isaa irraanfa-chuu isaa ti\*.

\*3 1Phe 2:9

\*5 Gal 5:6,22

\*7 Gal 6:10; 1Tas 3:12

\*8 Yoh 15:16

\*9 1Yoh 2:9,11

<sup>10</sup>Kanaafis obboloota ko, waama-muu keessanitti, fo'amuu keessanittis jabaachuudhaaf caalchisaa dhimmaa! Kana yoo gootan matumaa hin kuftan. <sup>11</sup>Akkasitti mootummaa gooftaa kee-nyaa fi fayyisaa keenyaa Yesus Kristos isa bara baraa sanatti galuun isiniif in kennama. <sup>12</sup>Kanaafis utuma isin wanta kana hundumaa beektanii, dhugaa isin bira jiru sanattis utuma jabaatanii, ani waa'ee kanaa yeroo hundumaa isin yaadachiisuuf nan jedha. <sup>13</sup>Dhagna koo isa akka godoo kana keessa hamma ani jirutti, yaadachiisee isin dammaqsuun koo qajeelaa dha jedhee fudhadheera\*. <sup>14</sup>Gooftaan keenya Yesus Kristos akka anatti argisiisetti, dhagni koo inni akka

godoo kun dafee buqqifamuuf akka jiru ani beeka\*. <sup>15</sup>Erga ani godaanee bood-dee immoo, wanta kana yeroo hundumaa akka isin yaadachuu dandeessan gochuudhaaf nan dhama'a.

\*13 2Qor 5:1,4

\*14 2Xim 4:6; Yoh 21:18-19

### Kristos Isa Raajotaan Dubbatame Ulfina Isaa Arguu Isaa

16 Gooftaan keenya Yesus Kristos humni isaa, deebi'ee dhufuun isaas isin biratti akka beekamu yommuu goone, nuyi surraa guddina isaa ija keenyaan arginee beeksifne malee, mammaaksa ogummaadhaan yaadame duukaa buune miti\*. <sup>17</sup>Inni Waaqayyo biraa ulfinaa fi guddina yommuu fudhate, sagaleen, "Kun ilma koo isa ani jaalladhu, isa gammachuun koo itti raawwatamuu dha" jedhu, isa guddicha surra-qabeessa sana biraa dhufearaaf. <sup>18</sup>Nuyi warri gaara qullaa'aa gubbaatti isaa wajjin turre immoo, sagalee waaqa irraa isaaf dhufe kana dhageenyeerra\*.

\*16 Mat 17:1-2; Luq 9:43

\*17-18 Far 2:7; Isa 42:1; Mat 3:17; 17:1-5; Mar 9:2-7; Luq 9:28-35

19 Ammas dubbiin raajoonni dubbatan kun caalchisee nuuf cime; isinis hamma boruun baqaqutti, bakkalchi garaa keessan keessa ibsus hamma ba'utti, dubbii kana akka ibsaa iddoo dukkanaatti ibsuutti yaadaan duukaa yoo buutan gaarii gochuu keessan. <sup>20</sup>Caalaadhumatti immoo raajiin caaf-fata qulqullaa'aa akka namni tokko yaada ofii isaatiin kennutti hiikamuun akka hin taane beekuun isin irra jira. <sup>21</sup>Raajii dubbachuun takkaa jaalala namaatiin hin taane; garuu namoonni hafuura qulqulluudhaan geggeeffamanii, wanta Waaqayyo biraa fudhatan dubbataniiru\*.

\*21 2Xim 3:16-17; 1Phe 1:10-12

### Barsiisonni Sobduun Dhumni Isaanii Maal Akka Ta'e Yaadachisuu Isaa

2 <sup>1</sup>Akkuma raajoonni sobduun saba sana gidduu turan, akkasuma barsiisonni sobduun isin gidduu in jiraatu. Isaan warra utuu irratti hin beekamin, barsiisa wanta amaname irraa kaachisee nama balleessu fidanii, goofticha isa isaan fure iyyuu gananii, ofii isaanii

irrattis badiisa ariifachiisaa fidanii dha\*. <sup>2</sup>Namoonni baay'eenis gad-dhiisatti jiraachuu isaanii kana duukaa in bu'u; sababii isaaniitiifis karaan dhugaa sun maqaa gadhee in argata\*. <sup>3</sup>Sassata isaaniitiin immoo dubbii mataa keessaa fuudhanii odeessaniin isin irraa in nyaatu; firdiin bara duriitii jalqabee isaan irratti kenname hojjechuu hin dhiifne, badiisi isaaniis dhi-baa'ee hin rafne\*.

\*1 Kes 13:1-3; Mat 24:11; Yih la 4

\*2 Rom 2:24

\*3 1Xim 6:3-5

4 Waaqayyo ergamoota iyyuu warra cubbuu hojjetan gad darbatee, boolla dukkanaa keessatti funyoo sibiilaatiin hidhamanii guyyaa firdiitiif akka kaa'aman godhe malee, isaan hin qusanne\*. <sup>5</sup>Bara biyya lafaa isa kan warra Waaqayyo malee jiraatanii, bishaan irra lolaases, Nohin isa qajeelina lallabu, namoota biraa torbaa wajjin oolche malee, biyya lafaa isa bara durii sana hin qusanne\*. <sup>6</sup>Inni mandaroota Sodoomii fi Gomoraatti faradee, ibiddaan balleessee daaraa gochuu isaatiin, warra Waaqayyo malee jiraatanii wanta dhufuuf jiru fakkeenya isaanii irraa akka argan godheera\*. <sup>7</sup>Looxin nama qajeelaa, isa gad-dhiisatti jiraachuu warra jal'ootaatti yaadaan rakkachaa ture immoo in oolche\*. <sup>8</sup>Namichi qajeelaan sun yeroo isaan gidduu jiraatu waan arguu fi waan dhaga'uun, lubbuun isaa isheen qajeeltuun sababii hojii isaanii isa seeraan walii hin gal-leef guyyaa guyyaatti isa keessatti in rakkatti turte. <sup>9</sup>Erga gooftichi, namoota Waaqayyoof bulan qorama keessaa baasuu, warra jal'oota immoo hamma guyyaa firdiitti adabaaf kaa'uu in beeka\*. <sup>10</sup>Caalaadhumatti immoo warra kajeellaa foonii isa nama xureessu duukaa bu'an, warra gooftummaa Waaqayyo isaan irraa qabu tuffatan adabaaf in kaa'a. Isaan warra addagee, warra of gammachiisanii dhas; warra akka ergamootaa waaqa keessatti ulfina qaban in arrabsu malee hin safeeffatan\*.

\*4 Uma 6:1-2; Yih la 6

\*5 3:6; Uma 6:1-22; 7:1-24; 8:18; 1Phe 3:20

\*6 Uma 19:24-25; Yih la 7

\*7 Uma 19:1-16,29

\*9 1Qor 10:13; Mul 3:10

\*10 Yih la 7,8,16

11 Ergamoonni Waaqayyoo warri barsiisota sobduu kana caalaa aangoo fi humna qaban illee, warra akka ergamootaa kana arrabsanii akka isaanitti faradamuuf gooftaa duratti isaan irratti hin dubbatan\*. <sup>12</sup>Warri adabaaf kaa'aman sun garuu akka bineensota waa yaadanii gargar hin baafnee, warra uumamuu isaaniitiin qabamuuf, ajjeefamuufis dhalatanii ti; wanta ofii isaanitti hin hubanne in arrabsu, isaan akkuma badiisa bineensota sanaatti ba-duuf jiru\*. <sup>13</sup>Gatii jal'ina isaaniiis jal'inni irratti in raawwatama. Isaan guyyaa guutuu jireenya keessa-ba'aa jiraachuudhaan kajeellaa isaanii isa hamaa raawwachuutti in gammadu; kajeellaa isaanii isa hamaatti jireenya keessa-ba'aa jiraachaa, yeroo isinii wajjin nyaatan, isaan xurii fi mudaa isinitti in ta'u\*. <sup>14</sup>Iji isaanii yeroo hundumaa hawwaan gara ejjituu in ilaala, cubbuu hojjechuu irraas aara hin galfatan. Namoota jabaatanii hin dhaabatin wallaalchisanii kiyyoo isaaniitti in galfatu; garaa sassatatti bare qabu; isaan warra abaarsa jala jiranii dha. <sup>15</sup>Karaa isa qajeelaa dhiisanii karaa irraa kaataniru; karaa Bala'aam ilma Be'or, isa jal'ina hojjechuudhaan bu'aa argachuu jaallate irra bu'aniiru\*. <sup>16</sup>Garuu inni irra-daddarbaa isaatiif in ifatame; harreen dubbachuu hin dandeenye sagalee namaatiin dubbattee, ma-aatummaa raajichaa ittifteetti\*.

\*11 Yih la 9

\*12 Yih la 10

\*13 Yih la 12

\*15-16 Lak 22:4-35; Kes 23:4; Nah 13:2; Mul 2:14; Yih la 11

\*16 Lak 22:28

17 Isaan kun akka burqituu bishaan in qabnee ti, akka hurrii bubbeen ofuuf tis; iddoon dukkana limixii isaanii kaa'amee jira\*. <sup>18</sup>Dubbii gowvummaa isaaniitiin guddisanii of inaju, akka kajeellaa foon isaaniitti gadhiisatti jiraachuu isaaniitiinis, warra'raa kaachuutti jiraatan keessaa namoota reeffuu baqatanii ba'an wallaalchisanii kiyyoo isaaniitti in galchu\*. <sup>19</sup>Warra kana birmadummaa in abdaahiisu, garuu ofii isaaniitti iyyuu garoota badiisaa ti; namni waanuma akka ooftaatti isa mo'eef garbicha in ta'a\*. <sup>20</sup>Gooftaa keenyaa fi fayyisaa keenya

Yesus Kristosin beekuudhaan, xurraa'ummaa biyya lafaa duraa baqatanii erga ba'anii, deebi'anii ittiin qabamanii yoo mo'aman, akki isaan itti jiran inni booddee isa duraa irra in hammaata\*. <sup>21</sup>Karaa qajeelummaa erga beekanii booddee, abboommii qulqulluu isa isaaniif kenname irraa garagaluu irra, takkaa utuu hin beekin hafaniiru utuu ta'ee, isaaniif in wayya ture\*. <sup>22</sup>Jechi inni, "Sareen diddigeed diddiga isaatti in deebi'a" akkasumas, "Booyyeen dhiqatee dhoqqee keessa gangalachuutti in deebi'a" jedhu dhugaa ta'uun isaa, waan isaan kana irra ga'uun in mul'ata\*.

\*17 Yih la 12-13

\*18 1:4; Yih la 16

\*19 Yoh 8:34; Rom 6:16

\*20 Mat 12:45

\*21 Luq 12:47-48; Ibr 10:26

\*22 Fak 26:11

### Waa'ee Abdi Deebi'ee Dhufuu Gooftaa Yaadachiisuu Isaa

3 <sup>1</sup>Michoota ko! Ani amma ergaa lammaffaa isiniif caafuu koo ti; isaan keessatti isin yaadachiisee yaada keessan isa qullaa'aa nan dammaqaa\*. <sup>2</sup>Wanta raajoonni qulqulloonni duraan dursanii dubbatan, abboommii gooftaa keenyaa fi fayyisaa keenyaa isa karaa ergamoota warra isiniif hojjetanii argatan yaadadhaa\*. <sup>3</sup>Guyyoota gara dhumaatti ga'iftoonni akka kajeellaa foon isaaniitti jiraatan ka'uuf akka jiran, duraan dursaatii beekaa! Isaan isiniitti ga'isuudhaaf\*. <sup>4</sup>"Deebi'ee dhufuun isaa abdachiifamee ture mitii? Meerree kan raawwatame ree? Erga abboonni keenya iyyuu du'anii, wanti hundinuus akkuma yeroo biyyi lafaa uumametti hafee in jiraata" in jedhu\*. <sup>5</sup>Jarri kun bantiwwan waaqaa durii jalqabanii akka uumaman, laftis sagalee Waaqayyootiin bishaaniin uumamee, bishaan keessaas ba'uu isaa yaadachuu dadhaban\*. <sup>6</sup>Bishaanuma sanaan immoo biyyi lafaa inni yeroo sana ture sun liqimfamee akka balleeffame hin yaadanne\*. <sup>7</sup>Bantiwwan waaqaa fi lafti, warri amma jiran kun immoo sagalee Waaqayyoo sanaan ibiddaan balleeffamuudhaaf qopheeffamanii, hamma guyyaa warri Waaqayyo malee jiraatan firdii argatanii badaniitti kaa'amani jiru.

- \*1 1:13  
 \*2 Yih la 17  
 \*3 1Xim 4:1; Yih la 18  
 \*4 His 12:22; Isa 5:19  
 \*5 Uma 1:2,6-9  
 \*6 2:5; Uma 7:4,11,17-21

8 Michoota ko! Guyyaan tokko goofticha biratti akka waggaa kumaa, waggaan kumnis akka guyyaa tokkoo ta'uu isaa yaadatti qabadhaa\*! \*Gooftaan wanta abdachiise raawwachuu-dhaaf hin seesu; akka namoonni tokko seesuutti isa lakkaa'an miti. Inni, namoonni hundinuu yaada garaa isaanii akka geddaratan malee, garri tokko iyyuu akka badan waan hin barbaaneef obsaan isiniif in danda'a\*.

- \*8 Far 90:4  
 \*9 His 18:23; 33:11; Anb 2:3; Rom 2:4; 1Xim 2:4

10 Guyyaan gooftaa immoo akka hattuun dhufutti in dhufa; guyyaa sanatti bantiwwan waaqaa sagalee gudiesee didichuun in dhidhimu; ijoon uumama lubbuu hin qabne hundinuu ho'a ibiddaatiin wal in gad dhiisa; lafti, wanti isa irratti hojjetame hundinuus gubatanii in badu\*. 11 Wanti kun hundinuu akkasitti wal in gad dhiisa erga ta'ee, isin namoota attamii ta'uutu isiniif ta'a ree? Jireenya qullaa'aa, jireenya namoota Waaqayyoo ta'u jiraachuun isin irra jira. 12 Akkasitti jiraattanii dhufa guyyaa Waaqayyoo in eeggattu, isaafis ariifattanii in hojjetu. Guyyaa sanaafis bantiwwan waaqaa ibiddaan gubatanii wal in gad dhiisu; ijoon uumama lubbuu hin qabne hundinuus ho'a ibiddaatiin in baqa. 13 Nuyi garuu akka abdii inni nuuf kenneetti,

bantiwwan waaqaa haaraa, lafa haaraas warra qajeelummaan keessa buufatu in eegganna\*.

- \*10 Mat 24:29,35,43-44; Luq 12:39; 1Tas 5:2; Mul 16:15  
 \*13 Isa 65:17; 66:22; Mul 21:1,27

14 Kanaafis michoota ko, isaan kana eeggachaa, warra xurii fi mudaa hin qabne taatanii, Waaqayyoo wajjin nagaa qabaattanii akka argamtaniif dhama'aa! 15 Gooftaan obsaan isiniif danda'uu isaa, fayyinaaf karaa isiniif kennuu isaatti lakkaa'adhaa! Obboleessi keenya Phaa-wulos inni jaallatamaan ogummaa Waaqayyoo isaaf kenneen waa'ee isaatiif isiniif caafeera\*. 16 Inni ergaa isaa hundumaa keessatti waa'ee dubbii kanaaf yeroo caafu akkuma kana in dubbata. Ergaa isaa keessa illee wanti hubachuun isaa nama dhibu tokko tokko jira; isa kanas warri wallaalonni, warri waanuma argan qabanii gad dhiisan, akkuma caaf-fata qulqullaa'aa isa kaanis jal'isan, badiisaaf akka isaanitti ta'utti hiikaa isaa in micciiru.

- \*15 3:9; Rom 2:4

17 Isin garuu michoota ko, isa kana duraan dursitanii beektaniittu; kanaafis irraa kaachuu warra seera Waaqayyoo hin eegneetiin fudhatamtanii sokkitanii, isa jabeessitanii qabattan irraa akka hin kufneef of eeggadhaa\*! 18 Ayyaana gooftaa keenyaatti, fayyisaa keenya Yesus Kristosin beekuuttis guddadhaa! Bara si'anaatti guyyaa bara baraattis isaaf ulfinni haa ta'u! Ameen\*.

- \*17 Mar 13:5  
 \*18 Yih la 25

# Ergaa Yohannis Erge

## Isa Duraa

### Sagalee Jireenyaa

1<sup>1</sup> Waa'ee isa jalqabaa jalqabee turee, sagalee jireenyaa sanaa isiniif in caafna. Nuyi isa dhageenyeerra, ija keenyaan isa argineerra, ilaallees har-ka keenyaan isa qaqqabanneerra\*. 2 Jireenyichi mul'ifameera\*; nuyi isa argineerra, isaafis dhugaa in baana; jireenya bara baraa isa abbaa bira ture, nuttis mul'ifame kana isinitti in himna\*. 3 Isinis nuu wajjin tokkummaa akka qabaattaniif, isa arginee fi isa dhageenye sana isinitti in himna; tokkummaan keenya immoo abbaadhaa wajjin, ilma isaa Yesus Kristosii wajjinis. 4 Kana hundumaas gammachuun keenya<sup>1</sup> guutuu akka ta'uuf isiniif caafna\*.

- \*1 Yoh 1:1,14  
 \*2 Yoh 1:4  
 \*4 Yoh 15:11; 16:24; 2Yoh la 12

### Waaqayyoo Ifa Ta'uu Isaa

5 Waaqayyoo ifa; dukkannis matumaa isa keessa hin jiru; ergaan nuyi isa irraa dhageenye isinitti himnus isuma kana\*. 6 Waaqayyoo wajjin tokkummaa qabna jennee dukkana keessa yoo deddeebine, in sobna; akka dhugaa sanaattis hin jiraannu\*. 7 Akka inni ifa keessa jiru, nuyis ifa keessa yoo deddeebine, nuyi walii keenyaa wajjin tokkummaa qabna, dhiigni ilma isaa Yesus immoo cubbuu hundumaattii nu qulleessa\*. 8 Cubbuu hin jabnu yoo jenne of in sossobna; dhugaanis nu keessa hin jiru\*. 9 Cubbuu keenya yoo isatti himanne, inni amamaa fi qajeelaa waan ta'eef, cubbuu keenya nuuf in dhiisa, jal'ina keenya hundumaattiis nu qulleessa\*. 10 Nuyi ubbuu hin hojjenne yoo jenne immoo sa sobduu in goona, dubbiin isaas nu eessa hin jiru.

- \*5 Yaq 1:17  
 \*6 2:4,9; Yoh 3:21  
 \*7 Ibr 9:14; Mul 1:5  
 \*8 Fak 20:9  
 \*9 Fak 28:13; Far 32:1-4

### Yesus Kristos Nama Nuuf Dhaabatu Ta'uu Isaa

2<sup>1</sup> Yaa ijoollee ko, akka isin cubbuu hin hojjenneef kana isiniifan caafa; namni tokko illee yoo cubbuu hojjete garuu, nama nuuf dhaabatu abbaa biraa qabna, innis Yesus Kristos isa qajeelaa dha\*. 2 Inni furee cubbuu keenyaa ti, cubbuu keenya duwwaafis miti cubbuu guutummaa biyya lafaatiifis malee\*. 3 Abboommii isaa ceguudhaan isa beekuu keenya in hubanna. 4 Namni, "Ani isa beeka" jedhee, abboommii isaa immoo hin eegne sobduu dha, dhugaanis isa keessa hin jiru\*. 5 Namni dubbii isaa eegu Waaqayyoon dhuguma akka jaallatu fiixaan baasee in argisiisa; kanaanis isatti jiraachuu keenya in hubanna\*. 6 Namni, "Isatti nan jiraadha" jedhu immoo, karaa Yesus Kristos irra adeeme irra adeemuun in ta'aaf\*.

- \*1 Rom 6:1-2; 8:34; Ibr 7:24-25  
 \*2 4:10; Qol 1:20  
 \*4 4:20  
 \*5 5:3; Yoh 14:21,23  
 \*6 Yoh 13:15

### Abboommii Isa Haaraa

7 Michoota ko! Abboommii moofaa isa durii durii jalqabee isin bira ture malee, amma abboommii haaraa isiniif hin caafu; abboommiin moofaan sun immoo dubbicha isuma isin dhageessanii dha\*. 8 Karaa tokko immoo abboommii haaraa isiniif nan caafa, kunis isa biratti isin birattis dhugaa dha; ifni dhugaa ammumaa waan ibsuuf, dukkanni darbuutti jira\*. 9 Namni, "Ani ifa keessan jira" jechaa obboleessa isaa immoo jibbu, amma iyyuu dukkana keessa jira\*. 10 Namni obboleessa isaa jaallatu ifa keessa in jiraata; isa keessas wanti nama gufachiisu hin jiru. 11 Namni obboleessa isaa jibbu garuu dukkana keessa jira, dukkanicha keessas in

deddeebi'a; dukkanichi ija isaa waan jaamseef, gara itti adeemu hin beeku\*.

\*7 Yoh 13:34; 2Yoh la 5

\*8 Yoh 8:12; Rom 13:12

\*9 4:20

\*11 Yoh 12:35

12 Isin ijoollota nana! Maqaa isaatiin cubbuun keessan akka isiniif dhiifame isiniif caafuuttan jira. <sup>13</sup> Isin abboota nana! Isa jalqabaa jalqabee jiru sana akka isin beektan isiniif caafuuttan jira. Isin dargaggoota nana! Isa hamaa akka mootan isiniif caafuuttan jira\*. <sup>14</sup> Isin ijoollota nana! Abbaa akka isin beektan isiniif caafeera; isin abboota nana! Isa jalqabaa jalqabee jiru sana akka beektan isiniif caafeera. Isin dargaggoota nana! Isin jaboo akka taatan, dubbiin Waaqayyoo isin keessa akka jiraatu, isa hamaas akka mootan isiniif caafeera.

\*13 1:1; Yoh 1:1

15 Biyya lafaa yookiis waan biyya lafaa jaallachuutti hin hidhamaa; namni tokko biyya lafaa jaallachuutti yoo hidhame, Waaqayyoo abbaa jaallachuun isa keessa hin jiru\*. <sup>16</sup> Wanti biyya lafaa keessa jiru hundinuu, hawwiin foonii, hawwiin ijaas, jireenyaan kooruunis biyya lafaa keessaa ba'a malee, abbaa biraa hin ba'u. <sup>17</sup> Biyyi lafaa, hawwiin isaas hundinuu in darba, namni fedha Waaqayyoo raawwatu garuu bara baraan in jiraata.

\*15 Yaq 4:4

### Dhufa Warra Kristosiin Mormanii

18 Ijoolllee! Yeroon kun isa dhumaa ti. Kristosiin kan mormu akka dhufu kanaan dura dhageessaniittu; ammas warri Kristosiin morman baay'ataniiru. Kanaafis yerichi isa dhumaa akka ta'e nuyi in beekna\*.

<sup>19</sup> Isaan nu keessaa ba'an malee kan keenya miti; utuu kan keenya ta'anii, nuu wajjin itti in fufu turan. Garuu isaan hundinuu kan keenya akka hin ta'in haa mul'atuuf nu keessaa ba'an\*. <sup>20</sup> Isin garuu isa qulqulluu sanaan dibamtaniittu; hundumti keessanis beektota\*. <sup>21</sup> Isin dhugaa waan hin beekneefan isiniif caafe miti, waan isin isa beektaniif dhugaa keessaas sobni tokko illee waan hin baa-

neefan isiniif caafe malee. <sup>22</sup> Isum Yesus kun, Kristos yookiis Masihi cha ta'uu isaa ganu malee, sobduu eenyu ree? Mormituun Kristos, inn abbaa fi ilma ganu isa kana\*. <sup>23</sup> Namni ilmicha ganu abbichaa wajjin fi rooma hin qabu; ilmicha amanachuu isaa kan beeksisu immoo abbichaa wajjinis firooma qaba\*.

\*18 1Phe 4:7; Mat 24:5,24; 2Yoh la 7

\*19 HoE 20:30; 1Qor 11:19

\*20 2:27

\*22 2:18

\*23 4:15; Yoh 5:23; 2Yoh la 9

24 Wanti isin jalqabaa jalqabdani dhageessan garaa keessan keessa haa jiraatu! Wanti isin jalqabaa jalqabdanii dhageessan garaa keessan keessa yoo jiraate, isinis ilmichaa fi abbichaa keessa in jiraattu. <sup>25</sup> Abdiin inni nu abdachiise isa kana; innis jireenya bara baraa ti. <sup>26</sup> Kanas waa'ee warra karaa irraa isin kaachisuutti jiraniifan isiniif caafe. <sup>27</sup> Dibanni isin isa biraa fudhattan garuu isin keessa in jiraata inni waan isin barsiisuuf namni biraa isin barsiisuu hin barbaachisu. Haa fuurri isaa inni dibata jedhame kur waa'ee waan hundumaa isin in barsiisa; barsiifni isaas dhugaa dha, sobni keessa hin jiru. Egaa akkuma inni isin barsiisetti isatti jiraadhaa\*!

\*27 Er 31:34; Yoh 14:26; 16:13

28 Ammas yaa ijoolllee ko! Yeroo Kristos mul'atutti ija-jabina akka qabaannu malee, guyyaa dhufa isaatti yeelloodhaan akka hin rifanneef, isumatti jiraadhaa\*! <sup>29</sup> Inni qajeelaa ta'uu isaa erga beektanii, namni waan qajeelaa hojjetu hundinuu immoo muca Waaqayyoo ta'uu isaa hubachuu in dandeessu\*.

\*28 4:17

\*29 3:7-10

### Ijoolllee Waaqayyoo Ta'uu

**3** <sup>1</sup> Abbaan jaalala guddaa attami akka nu argisiise mee ilaalaa Jaalala kanaan nuyi ijoolllee Waaqayyoo jedhamnee in waamamna; dhugamas nuyi ijoolllee isaa ti. Biyyi lafaa immoo Waaqayyoon waan hin beekneef, nu hin beeku\*. <sup>2</sup> Michoota ko Nuyi amma ijoolllee Waaqayyoo ti isa booddee immoo maal ta'uuf akkajirru mul'ataa miti. Haa ta'u iyyuu

malee, yommuu inni mul'atu inni akka jirutti isa arguuf waan jirruuf, akka isaa akka taanu beekna\*. <sup>3</sup> Akka kanatti kan isa abdatu hundinuu akkuma isa qulqulluu sanaatti of in qulqulleessa\*.

\*1 Yoh 1:12-13; 16:3

\*2 Rom 8:16-17; Filp 3:21; Qol 3:4

\*3 Ibr 12:14

4 Cubbuu kan hojjetu hundinuu seera malee in jiraata; cubbuunis seera malee jiraachuu dha. <sup>5</sup> Kristos cubbuu balleessuudhaaf akka mul'ate in beektu; inni garuu cubbuu hin qabu\*. <sup>6</sup> Egaa namni isatti qabamee jiraatu hundinuu cubbuu hin hojjetu; namni cubbuu hojjetu hundinuu garuu isa hin argine, isa hin beeknes\*.

\*5 Isa 53:9; Yoh 1:29; 1Phe 2:24

\*6 Rom 6:14

7 Yaa ijoolllee ko, homtinuu karaa irraa isin hin kaachisin! Inni sun qajeelaa akka ta'e, namni waan qajeelaa hojjetu qajeelaa dha\*. <sup>8</sup> Seexanni jalqabaa jalqabee cubbuu waan hojjeteeff, namni cubbuu hojjetu kan Seexanaa ti; ilmi Waaqayyoo immoo hojii Seexanaa diiguudhaaf mul'ate\*. <sup>9</sup> Namni mucaa Waaqayyoo ta'e hundinuu, sanyii Waaqayyoo waan ta'eef cubbuutti qabamee hin jiraatu; mucaa Waaqayyoo waan ta'eefis cubbuutti qabamee jiraachuu hin danda'u\*. <sup>10</sup> Namni waan qajeelaa hin hojjenne, obboleessa isaa hin jaallannes hundinuu, kan Waaqayyoo miti; ijoollleen Waaqayyoo fi ijoollleen Seexanaas kanaan in beekamu.

\*7 2:29

\*8 Yoh 8:44

\*9 5:18

### Wal Jaallachuu

11 Ergichi isin jalqabaa jalqabdani dhageessan, "Wal jaallachuun nuuf ta'a" isa jedhuu dha\*. <sup>12</sup> Akka Qaayin ta'uun hin ta'u. Inni kan isa hamaa sanaa ture; obboleessa isaas in ajjeese. Sababii maaliitiif immoo isa ajjeese? Hojiin ofii isaa hamaa ta'ee, hojiin obboleessa isaa qajeelaa waan ta'eef isa ajjeese\*.

\*11 Yoh 13:34; 15:12

\*12 Uma 4:8

13 Obboloota ko, namoonni biyya afaa yoo isin jibban hin dinqifataa\*! <sup>14</sup> Nuyi obboloota waan jaallan-

nuuf du'a keessaa gara jireenyaatti akka darbine beekna; namni nama hin jaallanne immoo du'a keessatti hafa\*.

<sup>15</sup> Obboleessa isaa kan jibbu hundinuu nama nama ajjeese dha; namni nama ajjeese abdii jireenya bara baraa of keessaa akka hin qabne isin iyyuu beektu\*. <sup>16</sup> Kristos lubbuu isaa nuuf kennuu isaatiin jaallalli maal akka ta'e hubanneerra; egaa nus immoo lubbuu keenya obbolootaaf kennuun nuuf ta'a\*. <sup>17</sup> Namni biyya lafaa kana irratti waan ittiin jiraatu qabu, dhaba obboleessa isaatti argee yoo garaa itti jabaate, jaallalli Waaqayyoo attamitti isa keessa jiraata ree\*? <sup>18</sup> Yaa ijoolllee ko! Kottaa dubbiidhaa fi afaaniin utuu hin ta'in hojiidhaa fi garaa dhugaadhaan in jaallannaa\*!

\*13 Yoh 15:18-19

\*14 2:11; Yoh 5:24; Efe 6:10

\*15 Mat 5:21-22

\*16 Yoh 15:13

\*17 Kes 15:7

\*18 Yaq 2:15-16

### Fuula Waaqayyoo Duratti Ija Jabina Qabaachuu

19 Nuyi kan dhugaa ta'uu keenya kanaan hubachuuf jirra, fuula Waaqayyoo durattis garaa keenya callama in jechisiifna. <sup>20</sup> Garaan keenya yeroo nutti faradutti immoo, Waaqayyoo garaa keenya irra caalee waan hundumaa akka hubatu in beekna\*. <sup>21</sup> Yaa michoota ko! Garaan keenya yeroo nutti hin farannettis, Waaqayyoo duratti ija-jabina qabna\*.

\*20 Isa 55:7-9; Luq 15:20-22

\*21 Ibr 4:16

22 Nuyi waanuma isa kadhannu isa biraa in fudhanna; abboommota isaa in eegna, waan isa gammachiisus in hojjenna\*. <sup>23</sup> Abboommiin isaa kunis, "Maqaa ilma koo Yesus Kristositti amanaa! Akka abboommii inni kennettis walii keessan jaalladhaa!" nuun jedha\*. <sup>24</sup> Namni abboommota isaa eegu isa keessa in jiraata; innis namicha keessa in jiraata; hafuura inni nuuf kenneenis nu keessa jiraachuu isaa in hubanna\*.

\*22 5:14-15; Mar 11:24

\*23 Yoh 6:29; 13:34; 15:12,17

\*24 4:13; Rom 8:9

### Hafuura Dhugaa Fi Hafuura Sobaa

**4** <sup>1</sup> Michoota ko! Warra hafuuraan in dubbanna jedhan hunda hin amanaa, Waaqayyo biraa yoo ta'an hafuurota isaan ittiin dubbatan qoraatii ilaalaa malee, raajooni sobduun baay'een gara biyya lafaatti ba'anii-ru\*. <sup>2</sup> Hafuurri, Yesus Kristos fooniin dhufuu isaa amanatee beeksisu hundi-nuu kan Waaqayyoo ti; kanaanis hafuura Waaqayyoo ta'uu isaa in hubatu. <sup>3</sup> Hafuurri akka kanatti Yesusin amanatee hin beeksifne hundinuu garuu, kan Waaqayyoo miti; inni kun hafuura isa Kristosiin mormu, isa isin akka inni dhufu dhageessanii dha. Inni amummaa biyya lafaa keessa jira\*. <sup>4</sup> Ijoollee ko! Isin kan Waaqayyoo ti, raajota sobduu sanas mootaniittu; hafuura isa biyya lafaa keessa jiru sana irra, isa isin keessa jirutu caala'o\*. <sup>5</sup> Isaan kan biyya lafaa ti; kanaaf isa biyya lafaa in dubbatu, biyyi lafaas isaan in dhaggeeffata\*. <sup>6</sup> Nuyi kan Waaqayyoo ti, namni Waaqayyoon beekus nu dhaggeeffata; inni kan Waaqayyoo hin ta' in immoo nu hin dhaggeeffatu. Kanaan hafuura dhugaa, hafuura sobaattii gargar baafnee in hubanna\*.

\*1 1Tas 5:19-22; Mat 7:15  
\*2 2:18,22  
\*4 Luq 11:22  
\*5 Yoh 15:19  
\*6 Yoh 8:47

### Waaqayyo Jaalala Ta'uu Isaa

**7** Michoota ko! Jaalalli kan Waaqayyoo waan ta'eef, kottaa wal in jaallannaa! Namni jaallatu hundinuu mucaa Waaqayyoo ti, Waaqayyoonis in beeka. <sup>8</sup> Waaqayyo jaalala waan ta'eef, namni hin jaallatin, Waaqayyoon hin beekne. <sup>9</sup> Waaqayyo akka nuyi isaan jireenya argannuuf, tokkicha ilma isaa gara biyya lafaatti erge; kanaan jaalalli Waaqayyoo nu gidduutti in mul'ate\*. <sup>10</sup> Nuyi Waaqayyoon hin jaallanne; inni garuu nu jaallate, ilma isaas cubbuu keenyaaf furee haa ta'uuf nuuf erge. Jaalala jechuun isa kana\*. <sup>11</sup> Michoota ko! Waaqayyo akkana erga nu jaallatee, nuufis immoo wal jaallachuun in ta'a. <sup>12</sup> Namni tokko illee Waaqayyoon tak-

kaa hin argine; yoo wal jaallanne, Waaqayyo nu keessa in jiraata, jaalalli inni ittiin nu jaallatus nu keessatti fiixaan ba'uu isaa ti\*.

\*9 Yoh 3:16  
\*10 2:2  
\*12 Yoh 1:18

**13** Inni hafuura ofii isaatii irraa waan nuuf kenneef, nuyi isa keessa, innis nu keessa akka jiraatu in hubanna\*. <sup>14</sup> Abbaan ilma isaa fayyisaa biyya lafaa godhee akka erge, nuyi argineerra, dhugaas in baana\*. <sup>15</sup> Namni Yesus ilma Waaqayyoo ta'uu isaa amanee yoo beeksise, Waaqayyo isa keessa, innis Waaqayyoo keessa in jiraata\*. <sup>16</sup> Nuyis jaalala Waaqayyo nuuf qabu hubanneerra, amanneerras. Waaqayyo jaalala; namni jaalalatti qabamee jiraatus Waaqayyo keessa in jiraata, Waaqayyos isa keessa in jiraata\*.

\*13 3:24  
\*14 Yoh 3:17  
\*15 5:5  
\*16 4:8

**17** Biyya lafaa kana keessatti akkuma Kristos jiraatetti jiraachuu keenyaan guyyaa firdiif ija-jabina qabna; kanaan jaalalli Waaqayyoo nu biratti fiixaan ba'uu isaa ti\*. <sup>18</sup> Jaalala keessa sodaan hin jiru; jaalalli inni iddoo ga'e sodaa gad baasee in gata; sodaan adabatti hidhamee waan jiruuf, namni sodaatu jaalalli isaa iddoo hin geenye. <sup>19</sup> Inni duraan dursee waan nu jaallateef, nuyis kottaa in jaallannaa! <sup>20</sup> Namni, "Waaqayyoon nan jaalladha" jedhee, obboleessa isaa immoo yoo jibbe, inni sobduu dha; obboleessa isaa isa arge kan hin jaallanne, Waaqayyoon isa hin argin jaallachuu hin danda'u\*. <sup>21</sup> Egaa namni Waaqayyoon jaallatu, obboleessa isaa immoo akka jaallatuuf abboommii kana isa biraa arganne\*.

\*17 2:28  
\*20 2:4,9  
\*21 Mat 22:36-40; Mar 12:29-31

### Amantiidhaan Biyya Lafaa Mo'uu

**5** <sup>1</sup> Yesus kun Masiihicha ta'uu isaa namni amanu hundinuu mucaa Waaqayyoo ti; isa dhalche sana namni jaallatu isa abbichattii dhalates immoo in jaallata\*. <sup>2</sup> Waaqayyoon yommuu

jaallannu, abboommii isaas yommuu goonu, ijoollee Waaqayyoo jaallachuu keenya in hubanna. <sup>3</sup> Waaqayyoon jaallachuu jechuunis abboommota isaa eeguu dha; abboommenni isaa immoo ba'aa ulfaatoo miti\*. <sup>4</sup> Sababii namni mucaa Waaqayyoo ta'e hundi-nuu biyya lafaa mo'uuf, ba'aa ulfaatoo itti hin ta'an; humni ittiin biyyi lafaa mo'amu kunis amantii keenya\*. <sup>5</sup> Eenyutu biyya lafaa mo'uu danda'a? Yesus ilma Waaqayyoo ta'uu isaa nama amanu duwwaatu biyya lafaa mo'uu danda'a\*.

\*1 4:15-16; Yoh 1:12-13  
\*3 2Yoh la 6; Yoh 14:15,23-24; Mat 11:30  
\*4 Yoh 16:33  
\*5 4:4; Rom 8:37

### Warra Yesus Kristosiif Dhugaa Ba'an

**6** Inni bishaaniin cuuphamee dhiiga isaa dhangalaasuuf dhufe isa kana; innis Yesus Kristos. Inni bishaan duwwaadhaan miti, bishaanii fi dhiigaan dhufe malee. Hafuurri qulqulluun kana dhugaa in ba'a, hafuurichi dhugaa dha\*. <sup>7</sup> Dhuga-baatu sadiitu jira\*. <sup>8</sup> Isaan kunis hafuuricha, bishaanicha, dhiigicha, sadanuus sagalee tokkoon dhugaa ba'u\*. <sup>9</sup> Isa namoonni dhugaa ba'an kan fudhannu erga taanee, inni Waaqayyo dhugaa ba'u immoo in caala. Dhugaan Waaqayyos isa inni ilma isaatiif dhugaa ba'ee dha\*. <sup>10</sup> Namni ilma Waaqayyooti amanu, dhugaa kana of keessaa qaba; namni Waaqayyoon hin amanne garuu, isa Waaqayyo ilma isaatiif dhugaa ba'e waan amanuu dhiiseef, Waaqayyoon sobduu gochuu isaa ti\*. <sup>11</sup> Waaqayyo jireenya bara baraa nuuf kenne; egaa dhugaan isaa isa kana; jireenya bara baraa kunis ilma isaa ceessatti argama\*. <sup>12</sup> Namni ilma Waaqayyoo qabaatu jireenyicha qaba; namni ilma Waaqayyoo hin qabaanne, jireenyicha hin qabu\*. <sup>13</sup> Yoh 19:34-35; 15:26  
\*8 HoE 10:47; Yoh 3:5; Mat 26:28  
\*9 Yoh 5:32,36-37; 8:18  
\*10 Rom 8:16; Yoh 3:33

\*11 Yoh 1:4  
\*12 Yoh 3:36

### Jireenya Bara Baraa Fi Du'a Bara Baraa Gargar Baasuu

**13** Isin warri maqaa ilma Waaqayyooti amantan, jireenya bara baraa qabaachuu keessan akka beektaniifan kana hundumaa isiniif caafe\*. <sup>14</sup> Akka fedha isaatti yoo isa kadhanne inni nuuf in dhaga'a; akka kanatti isa in amananna\*. <sup>15</sup> Kadhata keenya akka inni nuuf dhaga'u yoo beekne, waan kadhanne akka isa biraa argannus in beekna.

\*13 Yoh 20:31  
\*14 3:21-22; Yoh 14:13-14

**16** Namni tokko obboleessi isaa cubbuu du'a [bara baraatti] isa hin geessine utuu hojjetuu yoo arge haa kadhatuuf, Waaqayyo jireenya isaaf in kenna. Kunis warra cubbuu du'a [bara baraatti] isaan hin geessine hojjetan duwwaadhaaf ta'a; cubbuun du'a [bara baraatti] nama geessu jira; namni isa akkasii kanaaf haa kadhatu jechuu koo miti\*. <sup>17</sup> Seera malee jiraachuun hundi-nuu cubbuu dha; garuu cubbuun du'a [bara baraatti] nama hin geessine jira. <sup>18</sup> Mat 12:31; Ibr 6:4-6

**18** Namni mucaa Waaqayyoo ta'e cubbuutti qabamee akka hin jiraanne in beekna; ilmi Waaqayyoo isa in eega, inni hamaanis isa hin tuqu\*. <sup>19</sup> Nuyi kan Waaqayyoo akka taane, guutummaan biyya lafaa immoo harka isa hamaa jala akka jiru in beekna\*. <sup>20</sup> Ilmi Waaqayyoo dhufee isa dhugaa sana baruudhaaf, hubannaa akka nuuf kenne nuyi in beekna. Nuyi isa dhugaa sana keessa, ilma isaa Yesus Kristos keessas in jiraanna; Waaqayyo inni dhugaan, jireenya bara baraa isa kana\*. <sup>21</sup> Yaa ijoollee ko, waaqayyolii tolfaman irraa of eeggadhaa\*!

\*18 3:9; Yoh 17:15  
\*19 Gal 1:4  
\*20 Yoh 17:3  
\*21 1Qor 10:14

**1Yoh 5:7 "Dhuga-baatu sadiitu jira"; tokko duwwaatu "Bantii waaqaa keessa dhuga-baatu sadiitu jira isaanis 'Abbaa, sagalee, hafuura qulqulluus; isaan kun sadan immoo tokko' "** jedha.

# Ergaa Yohannis Erge

## Isa Lammaffaa

### Ittiin Lixa

1 Ana isa maanguddicha biraa, haa ga'u gara haadha warraa ishee fo'atamtee fi gara ijoollee ishee, warra ani dhugaadhaan jaalladhuu; ana kophaa miti, warri dhugaa hubatan hundinuu isin in jaallatu malee\*. 2 Jaallalli kunis, dhugichi inni nu keessatti hafee jiru bara baraan waan nu bira jiraatuuf. 3 Ayyaanni, araarri, nagaanis Waaqayyo abbaa biraa, Yesus Kristos ilma abbaa biraas dhugaatti, jaalalattis nu wajjin haa ta'u\*.

\*1 3Yoh la 1

\*3 1Xim 1:2; 2Xim 1:2

### Dhugaa Fi Jaalala

4 Ijoollee kee keessaa kaan, akkuma nuyi abbaa biraa abboommamnetti dhugicha duukaa utuu bu'anii argachuun baay'ee na gammachiise\*. 5 Yaa haadha warraa! Abboommii haaraa siif caafuuf miti, garuu nuyi walii keenya akka jaallannu, abboommii isa durii durii jalqabnee qabna turre sana sin yaadachiisa malee\*. 6 Jaalala jechuun akka abboommii Waaqayyootti jiraachuu dha; akkasitti akka jiraattaniif, abboommiin jalqabaa jalqabdanii dhageessan isa kana\*. 7 Warri nama wallaalchisan, Yesus Kristos fooniin dhufuu isaa amananii warri hin beeksifne, baay'een gara biyya lafaatti ba'aniiru; inni nama wallaalchisu, inni Kristosiin mormus isa akka-

siitti\*. 8 Of eeggadhaa! Miindaa guutu akka argattaniif, kanaa achi inni itt dadhabdan hundinuu isin duraa in bada\*.

9 Namni barsiisa Kristositti qabamuu dhiisee, kana irra darbee barsiisu, Waaqayyoon of biraa hin qabu; inni barsiisichatti qabamee jiraatu immoo, abbaa, ilmas of biraa qaba\*. 10 Namni barsiisa kana hin fudhanne isin barsiisuuf yoo dhufe garuu, mana keessanitti isa hin simatinaa! Nagaa iyyuu isa hin gaafatinaa\*. 11 Namni nagaa isa gaafatu, hojii isaa isa hamaattii hirmaachuu isaa ti\*.

\*4 3Yoh la 4

\*5 Yoh 13:34; 15:12,17;

1Yoh 2:7; 3:11,23

\*6 1Yoh 5:3

\*7 1Yoh 2:18; 4:1-3

\*8 Gal 4:11

\*9 1Yoh 2:23

\*10 2Tas 3:6,14

\*11 1Xim 5:22

### Ittiin Raawwata

12 Kanan isiniif caafu illee waan baay'ee qaba; garuu gammachuun keenya guutuu akka ta'uuf, qalamii-dhaan waraqata irratti isiniif caafuu hin barbaanne. Ani dhufee wal arginee afaaniin isinii wajjin haasa'uun nan abdadha\*.

\*12 1Yoh 1:4; 3Yoh la 13-14

13 Ijoolleen obboleettii kee ishee fo'atamtee nagaa siif dhaamu.

# Ergaa Yohannis Erge

## Isa Sadaffaa

### Ittiin Lixa

1 Ana isa maanguddicha biraa, haa ga'u gara Gaayos jaallatamaa isa ani dhugaadhaan jaalladhuu\*!

\*1 HoE 19:29; 20:4; Rom 16:23; 1Qor 1:14; 2Yoh la 1

2 Yaa michuu ko! Akkuma karaa lubbuu sitti tole, karaa hundumaan akka sitti tolu, akka ati fayyaa taatus nan kadhada. 3 Obbloonni tokko dhufanii, dhugaatti qabamtee akka jiraattu, dhugaadhaaf amanamuu kee mul'isanii yommuu dubbatan, guddaan gammade\*.

4 Ijoolleen koo dhugaatti qabamanii jiraachuu isaanii dhaga'uun gammachuu koo ti; gammachuu kana irra caalus hin qabu.

\*3 2Yoh la 4

### Wal Simachuun Obbloomtaa Jajamuu Isaa

5 Yaa michuu ko! Waan obbloomtaaf, caalaadhumatti immoo keessummootaaf gootu amanamummaadhaan in hojjetta. 6 Obbloonni keessummummaaf dhufan sun waa'ee jaalala kee waldaa kristiyaanaa duratti mul'isanii dubbataniiru; Waaqayyo duratti qajeelaa akka ta'utti karaadhaaf waan isaan barbaachisu laateefii, yoo isaan geggeessite gaarii hojjechuu kee ti\*. 7 Isaan maqaa Kristosiin barsiisuudhaaf ba'aniiru; warra amantoota hin ta'in irraas homaa hin fudhatan\*. 8 Nuyi dubbii dhugaa kana keessatti hidhata isaanii ta'uudhaaf namoota akkasii kana simannee gargaaruun nuuf in ta'a\*.

\*6 Tit 3:13

\*7 Mat 10:8; 1Qor 9:12,15

\*8 Mat 10:40; Rom 16:2; 1Ibr 13:2

### Gorsa Wal Diduu Irraa Of Eeggachiisu

9 Ani waldaa kristiyaanaatiif waan tokko caafeera; Diyotreefes inni geggeessituu ta'uu barbaadu immoo nu hin dhaga'u. 10 Egaa yoon dhufe, waan inni

hojjetuu fi isa inni dubbii hundee hin qabneen maqaa keenya balleessu hundumaa nan kaasa; kunumtuu isa ga'uu dinnaan, ofii isaatii obbloomta warra diidaa dhufan dhaga'uu dide; warra obbloomta kana dhaga'uu barbaadan immoo dhowwee, waldaa kristiyaanaa keessaa in baasa.

11 Yaa michuu ko! Waan hamaa hin akkeessin waan gaarii akkeessi malee; namni waan gaarii hojjetu, kan Waaqayyoo ti; namni waan hamaa hojjetu Waaqayyoon hin argine\*. 12 Namoonni hundinuu, waa'ee De-meexrosiif waan gaarii mul'isanii in dubbatu; ija dhugaa durattis waan gaariitu dubbatamaaf; nus immoo kana mul'ifnee in dubbanna, atis inni nuyi mul'ifnee dubbannu kun dhugaa akka ta'e in beekta\*.

\*11 1Yoh 2:29; 3:6,9

\*12 Yoh 21:24

### Ittiin Raawwata

13 Kanan siif caafu illee waan baay'ee qaba; garuu biriidhaa fi qalamiidhaan siif caafuu hin barbaadu\*. 14 Afaaniin walii wajjin akka haasofnuuf dafee si arguu nuun abdadha. 15 Nagaan siif haa ta'u, firoonni kee nagaa siif ergu; tokkuma tokkoon maqaa dha'iitti firoota keenyatti nagaa nuuf himi!

\*13 2Yoh la 12

# Ergaa Yihudaan Erge

### Nagaa

1 Ani Yihudaan garbichi Yesus Kristos obboleessi Yaaqoob, isin warra waamamtanii, Waaqayyo abbaadhaan jaallatamtanii, Yesus Kristosiin eegamtaniif kana caafuu oo ti\*.

1 Mat 13:55

2 Araarri, nagaan, jaalallis isiniif aa baay'atu\*!

? 2Phe 1:2

### Waa'ee Barsiisota Sobduu Isaan Yaadachiisuu Isaa

3 Michoota ko! Waa'ee fayyina walii wajjin qabnuuf duruma iyyuu isiniif caafuudhaaf dhama'aa utuun jiruu, amma amanti isa al tokkicha yeroo hundumaaf akka ta'utti warra Waaqayyoo qulqullaa'anitti dabarfame sanaaf akka loltaniif, caafee isin gorsuun gididiitti barbaachisaa ta'uu isaa argeera\*. 4 Warri Waaqayyo malee jiraatan, ayyaana Waaqayyo keenyaa argachuun

"Gad-dhiisatti jiraachuu dha" jedhanii yaada isaanii diddiiranii, gooftaa keenya Yesus Kristosin isa kophaa isaa gooftummaa qabus gananii, lo'anii nu gidduu galaniiru. Isaan kun wanta yakka isaanitti mursiisu kana jalatti duraan dursanii caafamaniiru\*.

\*3 1Xim 1:18

\*4 Gal 2:4; 2Phe 2:1-3

5 Isin waan ani amma isiniif caa-fuuf jedhu hundumaa in beektu. Haa ta'u iyyuu malee, ani isin yaadachiisuu nan barbaada; innis gooftichi saba isaa al tokkicha biyya Gibxii baasee akka isaan oolche, booddee immoo warra isatti hin amanin sana akka balleessee dha\*. 6 Isa Waaqayyo ergamoota warra aboo isaanitti kenname irra darbanii, lafa taa'umsa isaanii gad dhiisan, fuyyoo hidhaa bara baraatiin dukkana jalatti hidhee, firdii isa guyyaa guddaa sanaaf isaan eegu yaadadhaa\*! 7 Akkuma ergamoota sanaa immoo warri mandaroota Sodoomii fi Gomoraa, warri mandaroota naannoo sanaas halalum-maa keessa ba'anii, ejjumaadhaaf warruma akka isaanii nama hin ta'in duukaa iyyuu in adeemu turan. Isaan adaba ibidda bara baraa fudhachuudhaan, wanta warra akkasii irratti dhu-fuuf jiru argisiisuudhaaf fakkeenya ta'aniiiru\*.

\*5 Bau 12:51; Lak 14:29-30,35; Ibr 3:16-19

\*6 Uma 6:1-2; 2Phe 2:4,9

\*7 Uma 19:1-25; 2Phe 2:6,10

8 Akkasuma immoo warri lo'anii nu gidduu galanii, yaada isaanii abju'atan immoo xurii foon isaaniitti in dibu, gooftummaa Waaqayyo isaan irraa qabu in dagatu, warra akka ergamootaa waaqa keessatti ulfina qaban in arrabsu. 9 Mikaa'el angafni ergamootaa iyyuu, yeroo reeffa Musee irratti Seexanaa wajjin walitti falmanii wal qocco-lan, "Gooftaan sitti haa dheekamu!" jedhe malee, arrabsee itti faraduudhaaf ija hin jabaanne\*. 10 Isaan kun garuu waanuma beekuu dadhaban in arrabsu; wanta akka bineensota waa yaadanii gargar hin baafneetti dhageettii uuma-maatiin hubataniin immoo, in badu\*. 11 Isaaniif wayyoo! Isaan karaa Qaayin irra bu'aniiru, bu'aadhaaf jedhanii guutummaatti irraa kaachuu Bala'aamitti of gad dhiisaniiru; akkuma Qoraahi mormanii Waaqayyo irratti ka'uu

isaaniitiinis balleffamuu isaanii ti\*. 12 Jarri kun irbaata jaalalaa isa walii wajjin qabdan yeelloo malee isinii wajjin nyaachuun isaani xurii isiniitti in ta'a. Isaan garaa isaanii duwwaa-dhaaf in yaadu; isaan akka duumessa bokkaa of keessaa hin qabnee, isa qilleensa ofaamuu ti; akka muka yeroo ija kennuun isaaf ta'utti ija dhaabee ti, akka muka hundeedhaan buqqa'ee gogee qosoree ti\*. 13 Akkuma dha'aan galaanaa inni hunkuramaan hoomacha baasu, isaanis hojii isaanii isa yeellaasisaa akka hoomachaatti ol in baasu; isaan akka qorsaa ti; iddoon dukkana limixii bara baraan isaaniif kaa'amee jira\*.

\*9 Dan 10:13,21; 12:1; Mul 12:7; Kes 34:6; Zak 3:2; 2Phe 2:11

\*10 2Phe 2:12

\*11 Uma 4:3-8; Lak 22:1-35; 16:1-35; Kes 23:4; Nah 13:2; 2Phe 2:15

\*12 His 34:2,8; 2Phe 2:13,17

\*13 Isa 57:20; 2Phe 2:17

14 Henok Addaamii jalqabee dhaloota torbaffaa ture; inni waa'ee isaan kanaa immoo raajii dubbatee, "Kunoo, gooftichi kumaatama qulqulloota isaa wajjin in dhufa\*! 15 Inni nama hundumaa irratti faraduudhaaf taa'ee, waan warri Waaqayyo malee jiraatan jireenya akkasii keessatti hojjetan hundumaa, dubbii jajjabaa cubbamoondi warri Waaqayyo malee jiraatan isa irratti dubbatan hundumaa, bakkeetti baasee amansiisee, nama adduma addaan in adaba" jedhe\*. 16 Namoonni raajiin irratti dubbatame kun waan hundumaatti in guungumu, waan hundumaas in komatu, akka kajeellaa isaaniitti in jiraatu, afaaniin guddisanii of in jaju, warra waa irraa abdatan immoo sobanii in saadu\*.

\*14 Uma 5:18,21-24; Kes 33:2; Mat 25:31

\*15 Mat 12:36

\*16 2Phe 2:18

#### Of Eggachiisuu Isaa, Gorsuu Isaas

17 Isin garuu michoota ko, dubbii ergamoonni gooftaa keenyaa Yesus Kristos kanaan dura dubbatan yaadadhaa\*! 18 Isaan, "Yeroo gara dhumaatti ga'iftoonni warri Waaqayyo malee akka kajeellaa foon isaaniitti jiraatan dhufuuf jiru" jedhanii isinitti himaniiru\*. 19 Warri dhufan kun gargar ba'uu in fidu, yaada foonii jalas of in galchu, hafuuricha of

keessaa hin qaban\*. 20 Isin garuu michoota ko, amantii keessan isa hundumaa caalaa qulqulluu irratti dhaabamattii cimaa! Hafuura qulqulluudhaan geggeeffamaatii kadhadaa\*! 21 Jaalala Waaqayyoo keessatti of ega; araara ittiin gooftaan keenya Yesus Kristos jireenya bara baraatti isin geessu eegadhaa!

\*17 2Phe 3:2

\*18 2Phe 3:3

\*19 1Qor 2:14

\*20 Qol 2:7; Efe 6:18

22 Warra maman gara-laafina argisiisaa! 23 Warra kaan ibidda keessaa butaattii oolchaa! Warra kaan immoo, uffata isa cubbuu foon isaaniitiin xuraa'e iyyuu jibbuudhaan, ofii keessa-

niifis sodaachuudhaan, gara-laafina argisiisaa\*!

\*23 1Qor 3:15

#### Kadhata Galataa

24 Isin akka hin gufannetti Waaqayyo isin eeguu, mudaa malee gammachuudhaan ulfina isaa dura isin dhaabachiisuu in danda'a\*. 25 Waaqayyo fayyisaa keenya isa tokkichaaf karaa gooftaa keenyaa Yesus Kristos ulfinni, guddinni, aangoon, gooftummaanis lakkaa'amuu baraa fuula duraa jalqabee, ammas, bara baraanis haa ta'u. Ameen\*.

\*24 1Tas 5:23; Rom 16:25-27

\*25 1Xim 1:17; 2Phe 3:18; Rom 16:27